

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : Y.B DATUK JUSLIE BIN AJIROL

TARIKH : 24.5.2016

SOALAN : NO. 39

Datuk Juslie bin Ajirol [Libaran] minta **MENTERI PENDIDIKAN TINGGI** menyatakan kesediaan Kementerian menyemak semula had umur Program Biasiswa MyBrain15 bagi program MyMaster ditetapkan tidak melebihi 35 tahun pada 1 Januari 2016 manakala MyPhD tidak melebihi 45 tahun.

JAWAPAN

Untuk makluman Ahli Yang Berhormat, program Biasiswa *MyBrain15* adalah usaha Kementerian Pendidikan Tinggi (KPT) untuk memberi peluang kepada rakyat Malaysia bagi meningkatkan pengetahuan dan kemahiran dalam menghadapi cabaran ekonomi yang dinamik. Ia juga dapat memenuhi aspirasi Kerajaan ke arah memperkasakan lagi pembangunan modal insan untuk menjadi negara maju.

Dalam memenuhi keperluan ini, Kerajaan telah memberikan komitmen melalui Pengubahsuaian Bajet 2016 di mana YAB Perdana Menteri telah mengumumkan peruntukan tambahan sebanyak RM300 juta bagi meneruskan pelaksanaan penajaan program biasiswa *MyBrain15* kepada 20,000 rakyat Malaysia.

Seiring dengan matlamat Kerajaan untuk memperkuatkkan pembangunan inklusif dan mewujudkan masyarakat yang saksama, KPT pada 19 April 2016 telah menyemak semula had umur baru program *MyBrain15* berdasarkan keperluan semasa, iaitu :-

- (a) Program Biasiswa *MyBrain15* – MyMaster : Tidak melebihi umur 35 tahun pada 1 Januari 2016; dan
- (b) Program Biasiswa *MyBrain15* – MyPhd : Tidak melebihi umur 45 tahun pada 1 Januari 2016.

Penetapan had umur baharu ini adalah bagi memberi peluang kepada graduan yang tidak berjaya mendapat pekerjaan untuk terus menyambung pengajian mereka di peringkat Sarjana dan PhD. Di samping itu juga, ia bertujuan menggalakkan graduan, khususnya generasi muda meningkatkan pengetahuan dan kemahiran mereka sebelum melangkah ke alam pekerjaan.

Had umur baharu bagi program *MyBrain15* yang ditetapkan ini adalah relevan bagi pembangunan modal insan berkualiti ke arah memacu pembangunan negara.

SOALAN NO. 40

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL KEEMPAT, PARLIMEN KETIGA BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : DATO' HAJI ZAINUDIN BIN ISMAIL
(JELEBU)**

TARIKH : 24 MEI 2016 (SELASA)

SOALAN :

DATO' HAJI ZAINUDIN BIN ISMAIL (JELEBU) minta MENTERI PEMBANGUNAN WANITA, KELUARGA DAN MASYARAKAT menyatakan apakah Jabatan Kebajikan Masyarakat menyediakan sebarang skim latihan atau peluang pekerjaan buat penghuni Sekolah Tunas Bakti setelah dibebaskan.

JAWAPAN: YB DATO' SRI ROHANI ABDUL KARIM, MENTERI PEMBANGUNAN WANITA, KELUARGA DAN MASYARAKAT

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) prihatin terhadap penghuni Sekolah Tunas Bakti khususnya berkaitan dengan hala tuju dan masa depan mereka.

Sekolah Tunas Bakti adalah Sekolah Diluluskan bagi tujuan pemulihan akhlak kanak-kanak sebagai mana ditetapkan di bawah seksyen 65 Akta Kanak-Kanak 2001. Sekolah ini bertujuan untuk:

- i. Memberi pemulihan kepada kanak-kanak yang terlibat dengan jenayah dan tidak terkawal; dan
- ii. Mendidik kanak-kanak membina sikap positif, membentuk peribadi yang kukuh dan melengkapkan diri dengan ketrampilan bagi membolehkan mereka hidup berdikari dalam masyarakat.

Selaras dengan Konvensyen Mengenai Hak Kanak-Kanak (CRC) yang menekankan empat aspek iaitu kelangsungan hidup, pelindungan, perkembangan dan penyertaan, Sekolah Tunas Bakti turut memastikan halatuju dan masa depan penghuni dipenuhi. Antara perkhidmatan yang disediakan kepada penghuni-penghuni adalah jagaan dan perlindungan, kaunseling dan bimbingan, pelajaran akademik dan kemahiran/vokasional, pendidikan agama/moral dan sukan/riadah.

JKM telah mengambil inisiatif melaksanakan dwi-laluan pendidikan di mana penghuni boleh memilih untuk mengikuti pendidikan berteraskan akademik atau kemahiran/vokasional. Program ini dilaksanakan bagi persediaan kepada penghuni untuk mereka meneruskan kelangsungan hidup setelah keluar dari institusi.

Bagi program kemahiran/vokasional, sehingga tahun 2016, sebanyak 9 buah institusi Sekolah Tunas Bakti seluruh Malaysia telah menjalankan program yang melibatkan bidang industri seperti automotif, elektrikal, kimpalan, binaan bangunan, jahitan dan masakan. Justeru, Jabatan Kebajikan Masyarakat telah menjalankan kerjasama dengan Jabatan Pembangunan Kemahiran (JPK) dalam memastikan Sekolah Tunas Bakti

diiktiraf sebagai Pusat Bertauliah (*Accreditation Centre*) dan diberi Persijilan Latihan Kemahiran Malaysia berteraskan Standard Kemahiran Pekerjaan Kebangsaan (*National Occupational Skills Standard/ NOSS*).

Selain melaksanakan Persijilan Kemahiran Malaysia, JKM turut menjalankan kerjasama dengan Giatmara Sdn. Bhd. bagi memastikan penghuni turut menerima latihan kemahiran yang sewajarnya. Melalui kerjasama ini, penghuni yang terlibat akan dianugerahkan dengan Sijil Kemahiran Giatmara mengikut bidang latihan yang diceburi. Bagi penghuni yang tidak mengikuti program SKM dan Giatmara, mereka akan menyertai latihan kemahiran yang dijalankan di institusi secara modular mengikut kompetensi pencapaian masing-masing.

Pelaksanaan program latihan kemahiran di institusi dapat memberi manfaat dan impak yang lebih besar kepada penghuni di Sekolah Tunas Bakti. Memandangkan penghuni bukan sahaja melalui proses pemulihan dan pengintegrasian malah dilengkapkan juga dengan penanaman nilai-nilai kemahiran pekerjaan.

Penganugerahan persijilan ini juga memberi peluang untuk melanjutkan pelajaran ke peringkat yang lebih tinggi. Penghuni yang terlibat juga akan lebih berdaya saing dan berpeluang untuk meningkatkan taraf hidup mereka kelak sama ada melalui berkerja di sektor industri atau memulakan perniagaan sendiri berdasarkan kemahiran yang mereka miliki.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN ER TECK HWA [BAKRI]

TARIKH : 24 MEI 2016 (SELASA)

SOALAN

Tuan Er Tech Hwa minta MENTERI TENAGA, TEKNOLOGI HIJAU DAN AIR menyatakan maklumat terperinci bekalan air di setiap empangan dan kawasan bekalan air mentah, dan apakah rancangan untuk menyelesaikan masalah penurunan paras bekalan air dalam tempoh terdekat dan adakah Kerajaan akan meminta bantuan daripada negara luar dalam perkara ini.

JAWAPAN

Tuan Yang Dipertua,

1. Bekalan air minum di negara ini memang mengharapkan sepenuhnya kepada sumber air permukaan iaitu 83.9% daripada sungai, 14.6% daripada empangan dan hanya 1.5% daripada air bawah tanah. Oleh itu, semestinya sumber air permukaan daripada sungai dan empangan akan terkesan dengan fenomena EL-Nino yang dihadapi sekarang.
2. Berdasarkan data terkini, terdapat 59 buah empangan yang dikenal pasti hanya digunakan bagi tujuan bekalan air. Dari jumlah tersebut, 10 empangan terkesan dengan fenomena El Nino. Pada masa sekarang, langkah mitigasi yang diambil oleh Suruhanjaya Perkhidmatan Air Negara dan syarikat-syarikat air negeri dalam menangani kesan fenomena El Nino adalah memadai tanpa perlu bergantung kepada bantuan luar.

3. Antara langkah-langkah yang sedang diambil termasuk:

- (i) memantau rapi paras semua sungai dan empangan yang membekalkan sumber air mentah kepada loji-loji rawatan air di negeri masing-masing;
- (ii) melaksanakan pemberian awan dengan kerjasama Jabatan Meteorologi Malaysia di kawasan empangan dan kawasan tadahan air;
- (iii) mengenalpasti sumber-sumber air alternatif (seperti air kolam atau air bawah tanah) yang selamat digunakan bagi menambah sumber air yang sedia ada;
- (iv) mengaktifkan segera Pelan Kontingensi Bekalan Air sekiranya keadaan paras sungai dan empangan menyusut kepada paras waspada, amaran dan bahaya;
- (v) menyediakan keperluan-keperluan logistik bagi penghantaran bekalan air bantuan seperti lori tangki dan tangki statik ke tempat-tempat yang menghadapi gangguan bekalan air; dan

(vi) melaksanakan catuan air kepada pengguna-pengguna sekiranya paras sungai dan empangan menyusut ke paras kritikal.

NO. SOALAN : 42

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATUK JUSLIE BIN AJIROL [LIBARAN]

TARIKH : 24 MEI 2016 (SELASA)

SOALAN : 42

YB Datuk Juslie bin Ajirol [Libaran] minta PERDANA MENTERI menyatakan keberkesanan yang telah dicapai dalam langkah-langkah pengubahsuaian Bajet 2016 pada 28 Januari 2016 lalu terutama membabitkan belanja pembangunan di kawasan luar bandar.

JAWAPAN: YB SENATOR DATO' SRI ABDUL WAHID B. OMAR
MENTERI DI JABATAN PERDANA MENTERI

Tuan Yang di-Pertua,

Seperti Ahli Yang Berhormat maklum, pada 28 Januari 2016, Kerajaan telah mengumumkan langkah-langkah pengubahsuaian Bajet 2016. Langkah ini dibuat bagi mengoptimumkan perbelanjaan Kerajaan setelah mengambil kira impak kejatuhan harga minyak mentah dunia terhadap hasil negara. Pelaksanaan inisiatif tertentu di bawah langkah-langkah pengubahsuaian Bajet 2016 dijangka mampu mengimbangi impak negatif daripada kekurangan hasil khususnya dalam mengoptimumkan perbelanjaan Kerajaan. Selaras dengan pengumuman tersebut, Kerajaan perlu mengurangkan perbelanjaan sebanyak RM9 bilion, iaitu RM5 bilion daripada peruntukan Belanja Pembangunan (DE) dan RM4 bilion daripada peruntukan Belanja Mengurus (OE). Pengubahsuaian Bajet 2016 dibuat berdasarkan harga minyak mentah dunia pada kadar USD30/setong. Sekiranya harga minyak mentah dunia meningkat kepada USD35/setong, Kerajaan dijangka mendapat lebihan pendapatan sebanyak RM2.5 bilion, di mana ia akan disalurkan untuk melaksanakan projek-projek pembangunan kelak.

Langkah ini, walau bagaimanapun, bukan bermaksud pembatalan atau pengurangan kos projek tetapi ianya adalah pengurangan aliran tunai projek tahun 2016. Ini bermakna projek pembangunan yang telah dirancang termasuk projek luar bandar akan diteruskan pada tahun 2016 dan pada tahun-tahun seterusnya. Ini kerana, tahun 2016 merupakan tahun pertama pelaksanaan Rancangan Malaysia Ke-11 dan kebanyakan projek pembangunan masih berada di peringkat awal pelaksanaan,

langkah pengubahsuaian dapat memastikan aliran tunai setiap projek mengikut *milestone* projek yang sebenar. Perkara ini perlu dilihat dengan realistik di mana, terdapat pelbagai kekangan yang perlu ditangani di peringkat awal kitaran sesebuah projek dan ada sesetengah daripadanya yang *overcommitted*.

Bagi projek-projek yang jadual pelaksanaannya dianjak ke hadapan atau diperlahankan, ianya dijangka tidak akan memberi kesan yang ketara memandangkan aliran tunai dan siling kos yang dikurangkan pada tahun 2016 akan diganti pada tahun-tahun seterusnya.

Pada masa yang sama, langkah pengubahsuaian Bajet 2016 juga telah memberikan lebih perhatian dan tumpuan untuk merancang dan melaksanakan projek-projek *quick wins* yang akan dapat mendukung tema Rancangan Malaysia Ke-11, iaitu ‘Pertumbuhan Berpaksikan Rakyat’. Melalui langkah-langkah pengubahsuaian Bajet 2016, lebih banyak projek seperti rumah mampu milik, sekolah dan pusat kemudahan kesihatan di luar bandar serta Pusat-pusat Transformasi Luar Bandar (RTC) dapat dilaksanakan.

Sekian. Terima kasih.